

## USARS WENZA UHWEBO LUKAGWAYI OLUNGEMTHETHO LUBE NZIMA FUTHI LUMBE EQOLO

**Tshwane, 23 kuNhlolanja 2022** – Uphiko Lwemisebenzi Yemalingeniso Eqoqwayo LwaseNingizimu Afrika (SARS) ngokusebenzisa nomnyango walo Wemisebenzi Yomnotho Ongemthetho kanye neHhovisi Elilawula Impahla Emngceleni yenze uphenyo bashaqa ugwayi bengenela izinkampani zikagwayi nezimboni ezikhiqiza ugwayi KwaZulu-Natali, e-Western Cape naseGauteng.

Izindawo ezihloliwe nokwenziwe kuzo uphenyo zibandakanya izindawo zokuhlala zabakhokhintela abathile. Amasu okungenelela nemisebenzi imayelana nophenyo olubanzi kanjalo nocwaningomabhuku ezindabeni zentela kubakhiqizi bagwayi, abaqondisi bezinkampani, izikhungo ezihambisana nazo kanjalo nabantu ngenhloso yokuqinisekisa ukuthobela kwabo imigomo yentela kanye nokuhlonza ulwazi oluzokweseka lolu cwaningomabhuku.

Lawa masu okungenelela aqala emva kokuhlonzwa kwamaphutha uma kudalulwa olawulweni lwempahla emngceleni kanjalo nakumafomu eminingwane yentela kulezi zikhungo.

Imiphumela yophenyo olwenziwe:

- amakesi amakhulu angama-362 enani lika-R4.8 million e-Western Cape.
- amakesi amakhulu ayizi-3852 enani lika-R51 million e-Gauteng.
- Uphenyo lusaqhubeka echwebeni eDurban emva kokudalula okungelona iqiniso amakhonteyina angama-20 kuthiwe aqukethe ugwayi ongama-R24 million, yize uma kuhlolwa okokuqala kwatholakala umthwalo wezikhwama zikasimende. Ngaphezu kwalokho, lo owayehambisa impahla ngaphandle kwatholakala ukuthi uyabandakanyeka ekuhambiseni impahla ngaphandle engamakhilogremu ayi-10 million kagwayi wenani lika-R450 million. USARS uyaqhubeka nophenyo.

USARS ukhuthaza bonke abakhokhintela nabahwebi ukuba baqinisekise ukuthi izibophezelo zabo zentela nezolawulo lwempahla emngceleni zimi ngomumo futhi bayayithobela imithetho yentela nemithetho yokulawulwa kwempahla emngceleni.

UKhomishana wakwaSARS, uMnu Edward Kieswetter, ugcizelele ukuzinikela kwesikhungo nohulumeni ngobubanzi ekulwisaneni nanoma ikuphi ukuhweba okungemthetho kanye nemisebenzi yezomnotho yobugebengu. Uthe, “Labo abenza ngamabomu futhi abahlela ukuhlutha lokhu okumele kuze esikhwameni ngokwenza imisebenzi yokukhwabanisa kuzobhekwana ngqo. Loluhlobo lokuziphatha luzokwenziwa lube nzima futhi lumbe eqolo.”

Ngolwazi olwengeziwe, sicela uxhumane ne [Sarsmedia@sars.gov.za](mailto:Sarsmedia@sars.gov.za)